

23. september 2022

Nr. 1320

Politiit atuuffiat pillugu inatsisip Kalaallit Nunaannut atuutilernissaanut peqqussut

UAGUT MARGRETHEP AAPPAAT, Guutip saammaassineratigut, uppersaavugut:

Politiit atuuffiat pillugu inatsimmi nr. 444 9. juni 2004-meersumi § 28¹, pillasarnermut inatsisip, eqqartuussisarnermik inatsisip, sakkut pillugit inatsisip, politiit atuuffiat pillugu inatsisip, pillaanermik naammassinninnermut il. il. inatsisip aammalu ingerlatsineq pillugu inatsisip (Inupiloqatigiiaanut akiuinerup sakkortusinera il. il.) allanngortinneqarnissaannik inatsimmi nr. 501 12. juni 2009-meersumi § 8, imm. 3², pillasarnermut inatsisip aammalu politiit atuuffiat pillugu inatsisip (Kikkulluunniit eqqissisimanissaanut akornutaasumik iliuuseqartarnermut akiuinerup sakkortusinera il. il.) allanngortinneqarnissaannik inatsimmi nr. 1107 1. december 2009-meersumi § 4, imm. 3³, politiit atuuffiat pillugu inatsisip aammalu sutorniartarfinnut imigassamillu nioqquteqarsinnaanermut akuersissuteqartarnermut il. il. (Torsuusermik pissuseqarnissamut il. il. nalunaarutip unioqqutinneranut akiliisitsil-luni pillaanerup sakkortusinera) inatsisip allanngortinneqarnissaannik inatsimmi nr. 249 30. marts 2011-meersumi § 4⁴, pillasarnermut inatsisip, eqqartuussisarnermik inatsisip, sakkut aamma qaartartut pillugit inatsisip, politiit atuuffiat pillugu inatsisip aammalu pillaanermik naammassinninnermut il. il. inatsisip (Rocker-inut inupiloqatigiiaanullu il. il. suliniutit tunngatinneqartut) allanngortinneqarnissaannik inatsimmi nr. 733 25. juni 2014-meersumi § 7, imm. 3⁵, inini aalajangersimasuni pulaartoqannginnissaannik inatsisip aammalu politiit atuuffiat pillugu inatsisip (Hash-imik tuniniaasarnermut il. il. aammalu politiit peberspray-inik atuisarnerannut suliniutit tunngatinneqartut) allanngortinneqarnissaannik inatsimmi nr. 1722 27. december 2016-meersumi § 4, imm. 2⁶, politiit atuuffiat pillugu inatsisip aammalu akitsuuserineq pillugu inatsisip (Politiit data-t atorlugit misissuinnermut atorunik atuisarnerat aammalu timmisartuni ilaasut pillugit paasissutissanik atuisinnaanerat) allanngortinneqarnissaannik inatsimmi nr. 671 8. juni 2017-meersumi § 4⁷, politiit atuuffiat pillugu inatsisip (Zone-meeqqusaannginnermut malittarisassanik aalajangersaasinnaanermut annertusisamik piginnaatitaaneq) allanngortinneqarnissaannik nr.

Slotsholmsgade 10
1216 København K.

T +45 7226 8400
F +45 3393 3510

www.justitsministeriet.dk
jm@jm.dk

131 27. februar 2018-meersumi § 3⁸, politiit atuuffiat pillugu inatsimmi, eqqartuussisarnermik inatsimmi, illersornissaqarfiup siunertai, suliasai aaqqissugaanera il. il. pillugit inatsimmi aammalu sakkutooqarnerup iluani pillaanermut inatsimmi (Illersornissaqarfiup politiit ikiuuttarnera aammalu politiit pillugit naammagittaalliorsinnaanermut aaqqissuussinerup annertusiner il. il.) nr. 708 8. juni 2018-meersumi § 6⁹ kiisalu politiit atuuffiat pillugu inatsimmi (Nammineersinnaajunnaarsitsineq) nr. 83 30. januar 2019-meersumi § 3¹⁰ malillugit aalajangersarneqarpoq, inatsit Kalaallit Nunaannut atuutissasoq imatut oqaasertaqarluni:

Kapitali 1

Politiit siunertaat aamma atuuffiat

§ 1. Politiit inuiaqatigiinni kikkulluunniit toqqissisimanerat, isumannaassusaat, eqqissisimanerat torersumiinnerallu illersorlugit atuuffeqassapput. Politiit tamanna siunertaq ingerlatissavaat pinaveersaartitsinikkut, ikiuinikkut aammalu atuutsitsinikkut.

Kapitali 2

Politiit suliasaat

§ 2. Politiit suliasaraat

- 1) pinerlunnermut tunngasut pinaveersaatissallugit, kikkulluunniit eqqissisimanerat torersumiinnerallu illersussallugu aammalu inuit ataasiakkaat inuiaqatigiinnilu tamat isumannaassusaata navianartorsiortinneqarsinnaanera pinaveersaartissallugu,
- 2) kikkulluunniit eqqissisimanerannik torersumiinnerannillu akornusiisinnaasut pinngitsoortissallugit aammalu inunnut ataasiakkaanik inuiaqatigiinnilu tamaginnik akornusiisinnaasut pinngitsoortissallugit,
- 3) pinerlunniatigiinneq unitsissallugu aammalu pinerlunnerit paasinaassallugit malersussallugillu,
- 4) ulorianartorsiorfiusuni allani innuttaasut ikiussallugit,
- 5) inatsisit atuuttut malillugit misissuinerit nakkutilliinermillu suliasat ingerlatissallugit,
- 6) inatsisit atuuttut malillugit pisortat oqartussaarfii allat ikiussallugit aammalu
- 7) inatsisit atuuttut malillugit suliasat allat imaluunniit suliasat politiit atuuffianut pissusissamisoortumik attuumassuteqartut suliasat allat ingerlatissallugit.

§ 2 a. Politiit paasissutissat suliarisatik naapertorlugit akimortumik misissuisassapput, tamanna politiit suliassaasa ingerlanneqarnissaannut pisariaqaraangat, tak. § 2.

Imm. 2. Politiit paasissutissanik kikkulluunniit iserfigisinnaasaanniit pinngorfeqartunik katersuisinnaapput suliarinnissinnaallutillu tamanna politiit suliassaasa ingerlanneqarnissaannut pisariaqaraangat, tak. § 2.

Imm. 3. Imm. 1-mi 2-milu aamma taaneqartut politiit paasissutissanik suliarinninnerannut Justitsministeri malittarisassanik aalajangersaassaaq. Tassunga ilagitillugu, paasissutissat siunertat suut pillugit suliarineqarnissaannut, aammalu paasissutissanik piiaaneq qaqugukkut pisarnissaanut, aammalu suliarinninnermi teknikkikkut aaqqissuussaannikkullu piareesaataasartussat pillugit Justitsministeri malittarisassanik aalajangersaassaaq.

Kapitel 3

Politiit akuliunnerat

Aalajangersagaq naliginnaasoq

§ 3. Politiit taamaallaat innuttaasut pissuteqartumik akuliuffigisinnaavaat uani kapitalimi aalajangersakkat tunngavigalugit, inatsisinik allanik tunngaveqartut akuliunnerit pineqanngikkaangata. Inatsit manna malillugu nammineersinnaajunnaarsitsineq killilerneqassaaq, pisuni akuliunnernut sakkukinnerusunut periutsit naammakkaangata ulorianartorsiortitsinermik qaangiinnissamut. Nammineersinnaajunnaarsitsineq uani inatsimmi paasineqassaaq naalagaaffiup nunarsuarmioqatigiinni pisussaaffiinik naapertuuttumik naammassinnittumik.

Torersuuneq aamma isumannaassuseq

§ 4. Politiit suliassaraat kikkulluunniit eqqissisimanerannik akornusersuinikkut ulorianartorsiortitsisinnaaneriit pinaveersaartissallugit aammalu inuit ataasiakkaat inuiaqatigiinnilu tamat isumannaassusaannut ulorianartorsiortitsisinnaaneriit pinaveersaartissallugit.

Imm. 2. Imm. 1-imi taaneqartut ulorianartorsiornermik pinaveersaartitsineq pisariaqartinneqarpat, politiit sumiiffinninngaanniit peersitsisinnaapput killilersinnaallugillu sumiiffiit, sumiiffinnullu isertoqarnissanik nakkutiginiffinnik pilersitsisinnaallutik.

§ 5. Politiit suliassaraat kikkulluunniit eqqissisimanerannik akornusersuinikkut ulorianartorsiortitsisinnaaneriit pinngitsoortissallugit aammalu

inuit ataasiakkaat inuiaqatigiinnilu tamat isumannaassusaannut ulorianartorsiortitsisinnaanerit pinngitsoortissallugit.

Imm. 2. Imm. 1-imi taaneqartut ulorianartorsiornermik pinngitsoortitsinissaq siunertaralugu, politiit inuk imaluunniit inuit ulorianartorsiortitsisut akuliuffigisinnaavaat. Tassunga ilagitillugu politiit

- 1) naalakkiisinnaapput,
- 2) inuup timaa, atisai, pigisai, ingerlanermut atortorissaarutai misissorsinnaavaat, inuk pineqartoq pasineqarpat tamakkua tamat torersuunerannut akornusersuutitut atorneqartut imaluunniit inuit ataasiakkaat inuiaqatigiinnilu tamat isumannaassusaannut ulorianartorsiortitsiner-mut atorneqartut, aamma
- 3) inuit pigisaannik arsaarinnissinnaapput.

Imm. 3. Ulorianartorsiortitsinerup pinngitsoortinneqarnissaanut akuliun-neq sakkukinnerusoq iluaqutaanngippat, tak. imm. 2, pisariaqarpallu nam-merneersinnaajunnaarsitsisoqarsinnaavoq, tak. § 3, inummik inunnilluun-niit ulorianartorsiortitsisunik. Nammineersinnaajunnaarsitsineq sapin-ngi-samik sivikitsuussaaq qajassuartumillu ingerlanneqassalluni aammalu sa-pinngisamik sivilissuseqassalluni nalunaaquttap akunneri 6-it qaan-germagit.

Imm. 4. Politiit eqqartuussivik aalajangiiseqqaarnagu sumiiffimmut imaaliiallaanaq iserfigineqarsinnaanngitsumut isersinnaapput ulorianartor-siortitsiner-mik pinngitsoortitsinissaq imm. 1-imi taaneqartutut pisariaqar-pat.

§ 6. Tamat ornissinnaasaanni, ilinniartoqarfinni, inuusuttuaqqat ornit-tagaaanni, sunngiffimmut aaqqissuussiffinni assigisaanilu politiit inuup ti-maa, atisai, pigisai, ingerlanermut atortorissaarutai misissorsinnaavaat, ar-laata sakkumik/-nik paarisaqarsinnaanera imaluunniit tigummiaqarsinna-nera paasiniarlugu, tak. imm. 2.

Imm. 2. Imm. 1-imi taaneqartutut misissuineq pisinnaavoq, arlaata piner-lunnera tunngavilimmik pinaveersaartinniarlugu, inuit inuunerannik, peqqissusaannik atugarissaarneranillu navianartorsiortitsisoq.

Imm. 3. Imm. 1-imi taaneqartutut misissuinissamut aalajangiissaaq poli-tiit pisortaata imaluunniit politiit pisortaata piginnaatitaa. Aalajangiineq tunngavilersorlugu allaganngortinneqassaaq, tassani allaganngortitsiner-mi ilanngunneqassallutik sumiiffik aamma piffissaq aalajangiiner-mut tunnga-sut.

Katersuunnerit aamma eqiterunnerit

§ 7. Politiit suliaassaraat innuttaasut katersuussinnaanermut pisinnaati-taaffiat illersussallugu.

Imm. 2. Politiit pisinnaatitaapput katersuunnerit tamat peqataaffigisaat nakkutigissallugit. Katersuunnerit tamat peqataaffigisaat politiinut nalu-naarutigineqassapput, uani inatsimmi § 23-mi malittarisassat aalajangersak-kat malillugit.

Imm. 3. Politiit naalakkiutigisinnaavaat katersuunneq allami inger-lanneqassasoq, pilersaarutigineqartumi pinnani, imaluunniit atugassanik al-lanik aalajangersaasinnaapput katersuunnerup ingerlanneqarnissaanut, an-nertuumik akornusersuinikkut tamat torersuunerannut ulorianartorsiortitsi-sinnaasumik tunngavilimmik pasinartoqarpat, tassani ilagitillugit angallan-nernik annertuumik akornusersuinerit imaluunniit inuit ataasiakkaat inui-aqatigiinnilu tamat isumannaassusaannut ulorianartorsiortitsinerit.

Imm. 4. Politiit silami katersuunnissat inerteqqutigisinnaavaat, naliler-neqarpat tamat eqqissisimanerannik ulorianartorsiortitsisoqassasoq.

Imm. 5. Silami katersuunneq tamat eqqissisimanerannik ulorianartors-iortitsippat, politiit naalakkiisinnaapput katersuunneq unitsinneqarluni taamaatinneqassasoq.

Imm. 6. Imm. 4 malillugu inerteqquteqarneq malinneqanngippat, imaluunniit imm. 5 malillugu naalakkiut malinneqanngippat, katersuunneq unitsinneqarluni taamaatinneqarsimasutut isigineqassaaq, politiillu eqite-runneq iliuuseqarfigisinnaavaat.

§ 8. Politiit silami tamat katersuuffigisaanni katersuunnermut peqataasunut akuliussinnaapput, pineqartut tamat torersuunerannut uloria-nartorsiortitsippata imaluunniit inunnut ataasiakkaanut inuiaqatigiinnilu tamat isumannaassusaannut ulorianartorsiortitsippata.

Imm. 2. Tamat katersuuffigisaanni allani, imm. 1-imi eqqaaneqan-ngitsuni, katersuuttut aqutsisuata noqqaaneratigut, politiit peqataasunut akuliussinnaapput tamat torersuunerannik akornusersuinissamut ulorianaa-teqartunut. Katersuuttut aqutsisuat noqqaassuteqanngikkaluartoq politiit peqataasut akuliuffigisinnaavaat, pineqartut sakkortuumik tamat torersuu-nerannik akornusersuippata imaluunniit isumannaassuseq ulorianartor-siortippassuk.

Imm. 3. Imm. 1-imi aamma 2-mi taaneqartutut ulorianartorsiornerit pinn-gitsoortinniarlugit politiit akuliussinnaapput inummut inunnulluunniit ulo-rianartorsiortitsisunut. Tassunga ilagitillugu politiit

- 1) naalakkiisinnaapput,
- 2) inuup timaa, atisai, pigisai, ingerlanermut atortorissaarutai misissor-sinnaavaat, inuk pineqartoq pasineqarpat tamakkua tamat eqqissisi-

manerannik imaluunniit torersuunerannut akornusersuutitut ator-
neqartut imaluunniit inuit ataasiakkaat inuiaqatigiinnilu tamat isu-
mannaassusaannut ulorianartorsiortitsinermut atorneqartut, aamma

3) inuit pigisaannik arsaarinnissinnaapput.

Imm. 4. Ulorianartorsiortitsinerup pinngitsoortinneqarnissaanut akuliun-
neq sakkukinnerusoq iluaqutaanngippat, tak. imm. 3, pisariaqarpallu nam-
merneersinnaajunnaarsitsisoqarsinnaavoq, tak. § 3, inummik inunnilluun-
niit ulorianartorsiortitsisunik. Nammineersinnaajunnaarsitsineq sapin-ngi-
samik sivikitsuussaaq qajassuartumillu ingerlanneqassalluni aammalu sa-
pinngisamik sivilussuseqassalluni nalunaaquttap akunneri 12-it qaan-
gernagit.

Imm. 5. Politiit eqqartuussivik aalajangiiseqqaarnagu sumiiffimmut
imaaliallaannaq iserfigineqarsinnaanngitsumut isersinnaapput ulorianartor-
siortitsinermik pinngitsoortitsinissaq imm. 1-imi aamma 2-mi taaneqartutut
pisariaqarpat.

§ 9. Politiit suliassaraat eqiterunnerit pinngitsoortissallugit, tamat eqqis-
sisimanerannik aammalu torersuunerannik akornusiinissamut ulorianartors-
iortitsisut imaluunniit inuit ataasiakkaat inuiaqatigiinnilu tamat isumanna-
assusaannut ulorianartorsiortitsisut.

Imm. 2. Imm. 1-imi taaneqartutut ulorianartorsiorterit pinngitsoortinnia-
rlugit politiit akuliussinnaapput inummik inunnulluunniit ulorianartors-
iortitsisunut. Tassunga ilagitillugu politiit

- 1) naalakkiisinnaapput,
- 2) inuup timaa, atisai, pigisai, ingerlanermut atortorissaarutai misissor-
sinnaavaat, inuk pineqartoq pasineqarpat tamakkua tamat eqqissisi-
manerannik imaluunniit torersuunerannut akornusersuutitut ator-
neqartut imaluunniit inuit ataasiakkaat inuiaqatigiinnilu tamat isu-
mannaassusaannut ulorianartorsiortitsinermut atorneqartut, aamma
- 3) inuit pigisaannik arsaarinnissinnaapput.

Imm. 3. Ulorianartorsiortitsinerup pinngitsoortinneqarnissaanut akuliun-
neq sakkukinnerusoq iluaqutaanngippat, tak. imm. 2, pisariaqarpallu nam-
merneersinnaajunnaarsitsisoqarsinnaavoq, tak. § 3, inummik inunnilluun-
niit ulorianartorsiortitsisunik. Nammineersinnaajunnaarsitsineq sapin-ngi-
samik sivikitsuussaaq qajassuartumillu ingerlanneqassalluni aammalu sa-
pinngisamik sivilussuseqassalluni nalunaaquttap akunneri 12-it qaan-
gernagit.

Imm. 4. Politiit eqqartuussivik aalajangiiseqqaarnagu sumiiffimmut
imaaliallaannaq iserfigineqarsinnaanngitsumut isersinnaapput ulorianartor-
siortitsinermik pinngitsoortitsinissaq imm. 1-imi taaneqartutut pisariaqar-
pat.

Imm. 5. Politiit eqiterunneq siaruartissinnaavaat, najuuttut siaruarternisamat kunngip aqqani pingasoriarluni kajumissaarneqareeralutik siaruartinnigippata. Politiit saassunneqarpata, eqiterunneq siaruarterneqarsinnaavoq, najuuttut tamanna sioqqullugu kajumissaarneqanngikkaluartut. Politiit eqiterunnermik siaruarternissamat pissaanermik atuisinnaapput.

Inuit sanngiinnerusut aamma inuit navianartumi inissisimasut

§ 10. Politiit inuk napparsimanini, ajoqusersimanini imaluunniit imminut ikiorsinnaannginnini pissutigalugu imminut isumagisinnaanngitsoq ikiussavaat, sumiiffimmi naammattoorneqartoq pineqartumut ulorianartumi imaluunniit allanut inunnut ulorianartumi imaluunniit tamat torersuunerannut isumannaassusaannullu ulorianartumi. Pasineqarpat inuk nakorsamit ikiorneqartariaqartoq, pineqartoq piaarnerpaamik nakorsamit misissorneqassaaq. Sumiiffigisami nakorsamik najuuttoqanngippat, peqqinnissaqarfik aalajangersinnaavoq, pineqartumut misissuineq peqqinnissaqarfimmi sulusumit allamit ingerlanneqassasoq.

Imm. 2. Politiit inuup napparsimasup imaluunniit imminut ikiorsinnaanngitsup timaa, atisai, pigisai, ingerlanermut atortorissaarutai misissorsinnaavaat aamma eqqartuussivik aalajangiiseqqaarnagu sumiiffimmut imaaliiallaannaq iserfigineqarsinnaanngitsumut isersinnaapput, siunertaralugu

- 1) inuk naliliiffigissallugu aamma inuup imminut ulorianartorsiortissinnaanera nalilissallugu,
- 2) pineqartumut inunnulluunniit allanut ulorianartut pinngitsoortissallugit imaluunniit tamat torersuunerannut isumannaassusaannullu ulorianartut pinngitsoortissallugit imaluunniit
- 3) inuup pineqartup kinaassusaa paasiniallugu.

Imm. 3. Inummut napparsimasumut imaluunniit imminut ikiorsinnaanngitsumut imaluunniit inunnut allanut imaluunniit tamat torersuunerannut isumannaassusaannullu ulorianartut pinngitsoortinniallugu, politiit inummut pineqartumut allatigut akuliussinnaapput aamma naalak-kiisinnaapput aammalu pineqartoq pigisaanik arsaarsinnaallugu.

Imm. 4. Inummut napparsimasumut imaluunniit imminut ikiorsinnaanngitsumut imaluunniit inunnut allanut imaluunniit tamat torersuunerannut isumannaassusaannullu ulorianartorsiortitsinerup pinngitsoortinneqarnissanut akuliunneq sakkukinnerusooq iluaqutaanngippat, tak. imm. 2 aamma 3, pisariaqarpallu inuk pineqartoq napparsimasooq imaluunniit imminut ikiorsinnaanngitsoq nammerneersinnaajunnaartinneqarsinnaavoq, tak. § 3, pineqartup angerlaanneqarnissaa, nakorsamit misissorneqarnissaa imaluun-

niit allanut pineqartumut illersorsinnaasumik isumaginnissinnaasunut tunniunneqarnissaa siunertaralugu. Nammineersinnaajunnaarsitsineq sapinngisamik sivikitsuussaaq qajassuartumillu ingerlanneqassalluni.

§ 11. Politiit inuk imigassartorsimanini, ilisimajunnaarnartutorsimanini allatulluunniit aanngajaarniutitorsimanini pissutigalugu imminut isumagisinnaajunnaarsimasooq ikiussavaat, sumiiffimmi naammattoorneqartoq pineqartumut ulorianartumi imaluunniit allanut inunnut ulorianartumi imaluunniit tamat torersuunerannut isumannaassusaannullu ulorianartumi. Pasineqarpat inuk nakorsamit ikiorneqartariaqartoq, pineqartoq piaar-nerpaamik nakorsamit misissorneqassaaq. Sumiiffigisami nakorsamik najuut-toqanngippat, peqqinnissaqarfik aalajangersinnaavoq, pineqartumut misissuineq peqqinnissaqarfimmi sulisumit allamit ingerlanneqassasoq.

Imm. 2. Politiit inuup pineqartup timaa, atisai, pigisai, ingerlanermut atortorissaarutai misissorsinnaavaat aamma eqqartuussivik aalajangiiseqqaarnagu sumiiffimmut imaaliallaannaq iserfigineqarsinnaanngitsumut isersinnaapput, siunertaralugu

- 1) inuk naliliiffigissallugu aamma inuup imminut ulorianartorsiortissinnaanera nalilissallugu,
- 2) pineqartumut inunnulluunniit allanut ulorianartut pinngitsoortissallugit imaluunniit tamat torersuunerannut isumannaassusaannullu ulorianartut pinngitsoortissallugit imaluunniit
- 3) inuup pineqartup kinaassusaa paasiniarlugu.

Imm. 3. Inummut imigassartorsimalluni aalakoortumut imaluunniit inunnut allanut imaluunniit tamat torersuunerannut isumannaassusaannullu ulorianartoq pinngitsoortinniarlugu, politiit inummut pineqartumut akuliussinnaapput, naalakkiisinnaapput aammalu pineqartup aalakoornartuutaanik, ilisimajunnaarnartuutaanik imaluunniit allanik pigisaanik arsaarsinnaavaat.

Imm. 4. Inummut aalakoortumut imaluunniit inunnut allanut imaluunniit tamat torersuunerannut isumannaassusaannullu ulorianartorsiortitsinerup pinngitsoortinneqarnissaanut akuliunneq sakkukinnerusoq iluaqutaanngippat, tak. imm. 2 aamma 3, pisariaqarpallu inuk pineqartoq aalakoortoq nammerneersinnaajunnaartinneqarsinnaavoq, tak. § 3, pineqartup angerlaanneqarnissaa imaluunniit allanut pineqartumut illersorsinnaasumik isumaginnissinnaasunut tunniunneqarnissaa imaluunniit napparsimmavimmut, ikiortariallit inaannut imaluunniit isertitsivimmut allamulluunniit inissinneqarnissaa siunertaralugu. Nammineersinnaajunnaarsitsineq sapinngisamik sivikitsuussaaq qajassuartumillu ingerlanneqassalluni.

Imm. 5. Justitsministeri isertitsivinnut inissiisarnermut, nakorsamit misissorneqartarnermut, isertitsivimmiittunillu nakkutilliisarnermut malittarissasanik aalajangersaassaaq.

§ 12. Meeraq 12-it ataallugit ukiulik, § 11-imi taaneqartutut pisuni naammattoorneqartoq, isertitsivimmiittussanngortinneqarsinnaanngilaq.

Imm. 2. Meeraq 15-it ataallugit ukiulik, § 11-imi taaneqartutut naammattoorneqartoq, aatsaat isertitvivimmiittussanngortinneqarsinnaavoq allatut inissiinissaq isumannaassuseq eqqarsaatigalugu illersorneqarsinnaanngippat meeqqap pissusilersorneratigut. Meeraq 15-it ataallugit ukiulik isertitsivimmiittussanngortinneqarpat erngertumik nakorsamit pineqartoq misissorneqassaaq. Isertitsivimmiitsitsineq sapinngisamik sivikitsuussaaq qajasuartumillu ingerlanneqassalluni aammalu sapinngisamik sivilissuseqassalluni nalunaquttap akunneri 4-t qaangernagit, periarfissaanngippat piffissap taassuma iluani allamut illersorsinnaasumik meeqqamik paaqqutarinnissinnaasunut inissiinissaq.

Imm. 3. Politiit meeraq 15-it ataallugit ukiulik nammineersinnaajunnaartissimagunikku erngertumik meeqqamut oqartussaasunut, inunnik isumaginnittunut imaluunniit allanut illersorsinnaasumik meeqqamik paaqqutarinnissinnaasunut nalunaaruteqassaput.

Imm. 4. Meeraq 15-iniit 17-inut ukiulik isertitsivimmiitsinneqarpat, politiit pineqartup ivertitsivimmiitsitsineqarnera angerlarsimaffianut saaffignissutigissavaat.

Imm. 5. Sumiiffigisami nakorsamik najuuttoqanngippat, peqqinnissaqarfik aalajangersinnaavoq, pineqartumut misissuineq peqqinnissaqarfimmi sulisumit allamut ingerlanneqassasoq, tak. imm. 2.

§ 13. Meeraq §§ 10 og 11-imi taaneqatuniit pisuni allaanerusuni naammattoorneqarpat, meeqqap isumannaassusaanut imaluunniit peqqissusaanut ulorianartumi, politiit meeraq isumagissavaat. Pasitsaanneqarpat meeraq napparsimasoq imaluunniit annertuumik ajoqusersimasoq, taava piaarnerpaamik meeraq pineqartoq nakorsamut misissortinneqassaaq. Sumiiffigisami nakorsamik najuuttoqanngippat, peqqinnissaqarfik aalajangersinnaavoq, pineqartumut misissuineq peqqinnissaqarfimmi sulisumit allamut ingerlanneqassasoq.

Imm. 2. Politiit meeqqap timaa, atisai, pigisai, ingerlanermut atortorisaarutai misissorsinnaavaat aamma eqqartuussivik aalajangiiseqqaarnagu sumiiffimmut imaaliiallaanaq iserfigineqarsinnaanngitsumut isersinnaapput, siunertaralugu

- 1) meeqqamut ulorianaataasup nalilernissaa,
- 2) meeqqap ulorianartorsiortinneqarsinnaanerata pinngitsoortinnissaa imaluunniit
- 3) meeqqap kinaassusaata paasinissaa.

Imm. 3. Meeqqamut ulorianarteq pinngitsoortinniarlugu politiit pineqartumut akuliussinnaapput, naalakkiisinnaapput aammalu meeqqap pigisaanik arsaarsinnaallugu.

Imm. 4. Meeqqamut ulorianartorsioritsinerup pinngitsoortinneqarnissaanut akuliunneq sakkukinnerusoq iluaqutaanngippat, tak. imm. 2 aamma 3, pisariaqarpallu meeraq nammerneersinnaajunnaartinneqarsinnaavoq, tak. § 3, erngertumik meeqqamut oqartussaasunut, inunnik isumaginnittunut imaluunniit allanut illersorsinnaasumik meeqqamik paaqutarinnissinnaasunut pineqartup tunniunnissaa siunertarlugu. Nammineersinnaajunnaarsitsineq sapinngisamik sivikitsuussaaq qajassuartumillu ingerlanneqassalluni. Nammineersinnaajunnaarsitsineq sapinngisamik sivikitsuussaaq qajassuartumillu ingerlanneqassalluni aammalu sapinngisamik sivisuseqassalluni nalunaaquttap akunneri 6-it qaangernagit.

Kapitali 4

Politiit pissaanermik atuinerat

Aalajangersakkat naliginnaasut

§ 14. Kapitalimi uani aalajangersakkat politiit pissaanermik atuinerannut aammalu pinerluttulerinermi pisinnaatitaaffinnut atuupput.

§ 15. Politiit pissaanermik atuisinnaapput

- 1) tamat eqqissisimanerannut, torersuunerannut inuit ataasiakkaat inui-aqatigiinnilu tamat isumannaassusaannut ulorianartorsioritsisut pina-veersaartinnissaat pinngitsoortinnissaallu siunertarlugu,
- 2) arlaat sakkumik pigisaqarnersoq imaluunniit tigummiarnersoq misissornissaa siunertarlugu,
- 3) pinerlunnerit unitsinnissaannut imaluunniit pinerlunnernik paasiniaa-nermut malersuinnermullu tunngatillugu pinerlunnerit unitsinnissaan-nut,
- 4) oqartussat pisortaqarfiinut allanut ikiuunnermut tunngatillugu,
- 5) misissuinnermik nakkutiginninnermillu suliassanut tunngatillugu, aamma
- 6) meeqqap imaluunniit aalakoortup, napparsimasup imaluunniit immi-nut ikiorsinnaanngitsup ulorianartorsiorsinnaanerata naliliiffiginissaa siunertarlugu.

§ 16. Politiit pissaanermik atuinerat pisariaqassaaq illersorneqarsinnaasumillu ingerlanneqassalluni aammalu illersorniakkamut/-nut tunngatilugu taamaallaat atortoqarluni naleqquttunik, annertussuseqarlunilu nalequttumik, ingerlanneqassalluni. Illersorneqarsinnaanera eqqarsaati-galugu nalilersuineri ilanngunneqassaaq, pissaanermik atuineri allat sussuteqanngitsut ajoquserneqaratarsinnaanerit.

Imm. 2. Pissaanermik atuisoqassaaq qajassuartumik, avatangiisit peqataaffigisinnaasaannik aammalu ajoquserneqaratarsinnaanera minnerpaaffissaaniitinneqassaaq.

Pissaanermik atueriaatsit immikkuullarissut pillugit aalajangersakkat

§ 17. Tulliuttuni taaneqartut siunertaralugit aallaasit taamaallaat atorneqarsinnaapput

- 1) inummut saassussilernerup imaluunniit inummut navianartorsiortitsilluni saassussilernerup pinngitsoortinnissaanut,
- 2) inuit annertuumik ulorianartorsiortinneqarnerisa imaluunniit peqqis-sutsikkut annertuumik ajoqusersinnaanerisa pinngitsoortinnissaan-nut,
- 3) suliffeqarfinnut atortulersuuteqarfiilluunniit inuiaqatigiinnut pingaa-ruteqartunut saassussilernerit imaluunniit navianartorsiortitsilluni sa-assussilernerit pinngitsoortinnissaannut,
- 4) inuup inoqatiminut ulorianartumik saassussisutut imaluunniit saassus-sisimasutut tunngavissaqarluartumik pasisap tigusarinissaanut, aarle-rinangippat pineqartup tigusariniarneqarnermini saassusseqqeri-ataarsinnaanera,
- 5) inuup suliffeqarfinnut atortulersuuteqarfiilluunniit inuiaqatigiinnut pingaaruteqartunut saassussisutut imaluunniit saassussisimasutut tunngavissaqarluartumik pasisap tigusarinissaanut, imaluunniit
- 6) inuup naalagaaffiup namminersorneranut, isumannaassusaanut, tunngaviusumik naalagaaffiup inatsisaanut imaluunniit naalagaaf-fimmi oqartussaqaarfinnut qullersaasunut saassussisutut imaluunniit saassussisimasutut tunngavissaqarluartumik pasisap tigusarinissaa-nut.

Imm. 2. Politiit inummut ajoqusiisinnaasumik aallanninnginnerminni sa-pinngisamik pineqartumut kalerrisaarillutik suaartaqqaassapput taassumalu kingorna kalerrisaarummik aallaassapput, kalerrisaarutigalugu pineqartu-mut aallaanninnissamik siunertaqarlutik naalakkiinertik naalanneqanngiin-narpat. Aammalu qulakkeerneqassaaq, sapinngisamik pineqartup naalakki-ummut naalannissamut periarfissinneqarnissaa.

Imm. 3. Aallaanninniarnermut atatillugu sussuteqanngitsut eqqor-toorneqarsinnaaner at ulorianaataavallaarpat, taava aatsaat pinartoqavitsillugu aallaannittoqassaaq.

Imm. 4. Imm 1, nr. 1-mi imaluunniit nr. 2-mi taaneqartutut pisoqanngippat, politiit naalakkaminnit naalakkerneqarnikkut aallaasinik taamaallaat atuisinnaatitaapput.

Imm. 5. Politiit aallaanninnerannik inuk ajoquserneqarpat, pineqartoq piaarnerpaamik nakorsamit misissorneqassaaq. Sumiiffigisami nakorsamik najuuttoqanngippat, peqqinnissaqarfik aalajangersinnaavoq, pineqartumut misissuineq peqqinnissaqarfimmi sulisumit allamit ingerlanneqassasoq.

§ 18. Tulliuttuni taaneqartut siunertaralugit anaatat taamaallaat ator-neqarsinnaapput

- 1) inummik saassussinerup imaluunniit pineqartumut annertuumik ulorianaartorsiortitsilluni saassussinerup pinngitsoortinneqarnissaa siunertaralugu,
- 2) inuit inuunerannut imaluunniit peqqissusaannut annertuumik ulorianaartorsiortitsinerit pinngitsoortinneqarnissaat siunertaralugu,
- 3) suliffeqarfinnut atortulersuuteqarfilluunniit inuiaqatigiinnut pingaaruteqartunut saassussilernerit imaluunniit navianartorsiortitsilluni saassussinerit pinngitsoortinnissaannut,
- 4) pigisanut saassussilernerit imaluunniit navianartorsiortitsilluni pigisanut saassussinerit pinngitsoortinnissaannut,
- 5) inuiaqatigiinni kiffartuussinerit, iliuuseqarnikkut akerliuffigineqartut, ingerlanneqaannarnissaat siunertaralugu, imaluunniit
- 6) ilatsiinnarluni akerliuffigineqartut inuiaqatigiinni kiffartuussinerit ingerlanneqaannarnissaat siunertaralugu, nalilerneqarpat kiffartuussineq ingerlaannarsinnaajunnaartinneqartoq aammalu sakkukinnerusumik pissaanermik atuneq alla naleqqutinngitsoq.

Imm. 2. Aqquuserngit, inissiat il. il. inuunerannissaat siunertaralugu anaatanik atuilertinnani pineqartunut kalerriutigineqaqqaassaaq, politiit anaatanik atuinissamut pilersaaruteqalernerat, politiit naalakkiinerat naalanneqanngippat. Sapinngisamik aamma qulakkeerneqassaaq, pineqartut naalakkiummut naalannissamut periarfissinneqarnissaat.

Imm. 3. Politiit anaatanik atuinerat inuup ajoquserneranik kinguneqarsimappat, pineqartoq piaarnerpaamik nakorsamit misissorneqassaaq, pineqartup misissortinnissaa pisariaqanngitsutut nalilerneqarsimanngippat. Sumiiffigisami nakorsamik najuuttoqanngippat, peqqinnissaqarfik aalajangersinnaavoq, pineqartumut misissuineq peqqinnissaqarfimmi sulisumit allamit ingerlanneqassasoq.

§ 19. Tulliuttuni taaneqartut siunertaralugit qimmit taamaallaat ator-neqarsinnaapput

- 1) inummik saassussinerup imaluunniit pineqartumut annertuumik ulori-anartorsiortitsilluni saassussinerup pinngitsoortinneqarnissaa siunertaralugu,
- 2) inuit inuunerannut imaluunniit peqqissusaannut annertuumik uloria-nartorsiortitsinerit pinngitsoortinneqarnissaat siunertaralugu,
- 3) suliffeqarfinnut atortulersuuteqarfiilluunniit inuiaqatigiinnut pingaa-ruteqartunut saassussilernerit imaluunniit navianartorsiortitsilluni sa-assussinerit pinngitsoortinnissaannut,
- 4) pigisanut saassussilernerit imaluunniit navianartorsiortitsilluni pigi-sanut saassussinerit pinngitsoortinnissaannut,
- 5) isumannaatsumik inunnik tiguserinninnissaq siunertaralugu,
- 6) inuiaqatigiinni kiffartuussinerit, iliuuseqarnikkut akerliuffigineqartut, ingerlanneqaannarnissaat siunertaralugu, imaluunniit
- 7) inuiaqatigiinni kiffartuussinerit, ilatsiinnarnikkut akerliuffigineqar-tut, ingerlanneqaannarnissaat siunertaralugu, nalilerneqarpat kiffar-tuussineq ingerlaannarsinnaajunnaartinneqartoq aammalu sakkukin-nerusumik pissaanermik atuineq alla naleqqutinngitsoq.

Imm. 2. Qimmeq atorneqalertinnagu pineqartunut kalerriutigineqaaq-qa-assaag, politiit qimmimik atuinissamut pilersaaruteqalernerat, politiit naalakkiinerat naalanneqanngippat. Sapinngisamik aamma qulakkeerne-qassaaq, pineqartut naalakkiummut naalannissamut periarfissinneqarnis-saat.

Imm. 3. Politiit qimmimik atuinerat inuup ajoquserneranik kingune-qarsimappat, pineqartoq piaarnerpaamik nakorsamit misissorneqassaaq, pineqartup misissortinnissaa pisariaqanngitsutut nalilerneqarsimanngippat. Sumiiffigisami nakorsamik najuuttoqanngippat, peqqinnissaqarfik aalaja-ngersinnaavoq, pineqartumut misissuineq peqqinnissaqarfimmi sulisumit allamit ingerlanneqassasoq.

§ 20. Tulliuttuni taaneqartut siunertaralugit gassi taamaallaat atorne-qarsinnaavoq

- 1) inummik saassussinerup imaluunniit pineqartumut annertuumik ulori-anartorsiortitsilluni saassussinerup pinngitsoortinneqarnissaa siunertaralugu,
- 2) inuit inuunerannut imaluunniit peqqissusaannut annertuumik uloria-nartorsiortitsinerit pinngitsoortinneqarnissaat siunertaralugu,
- 3) suliffeqarfinnut atortulersuuteqarfiilluunniit inuiaqatigiinnut pingaa-ruteqartunut saassussilernerit imaluunniit navianartorsiortitsilluni sa-assussinerit pinngitsoortinnissaannut,

- 4) pigisanut saassussilernerit imaluunniit navianartorsiortitsilluni pigisanut saassussinerit pinngitsoortinnissaannut, imaluunniit
- 5) inuiaqatigiinni kiffartuussinerit, iliuuseqarnikkut imaluunniit ilatsiinnarnikkut akerliuffigineqartut, ingerlanneqaannarnissaat siunertaralugu.

Imm. 2. Gassi atorneqalertinnagu pineqartunut kalleriutigineqaqqaasaaq, politiit gassimik atuinissamut pilersaaruteqalernerat, politiit naalakkiinerat naalanneqanngippat. Sapinngisamik aamma qulakkeerneqassaaq, pineqartut naalakkiummut naalannissamut periarfissinneqarnissaat.

Imm. 3. Politiit gassimik atuinerat inuup iluaalliulerneranik kinguneqarsimappat, nalilerneqarpallu iluaalliuut nakorsamit misissorneqartariaqartoq, pineqartoq piaarnerpaamik nakorsamit misissorneqassaaq. Sumiiffigisami nakorsamik najuuttoqanngippat, peqqinnissaqarfik aalajangersinnaavoq, pineqartumut misissuineq peqqinnissaqarfimmi sulisumit allamit ingerlanneqassasoq.

§ 20 a. Tulliuttuni taaneqartut siunertaralugit pebersprayi taamaallaat atorneqarsinnaavoq

- 1) inummik saassussinerup imaluunniit pineqartumut annertuumik ulorianartorsiortitsilluni saassussinerup pinngitsoortinneqarnissaa siunertaralugu,
- 2) inuit inuunerannut imaluunniit peqqissusaannut annertuumik ulorianartorsiortitsinerit pinngitsoortinneqarnissaat siunertaralugu,
- 3) suliffeqarfinnut atortulersuuteqarfiilluunniit inuiaqatigiinnut pingaaruteqartunut saassussilernerit imaluunniit navianartorsiortitsilluni saassussinerit pinngitsoortinnissaannut,
- 4) pigisanut saassussilernerit imaluunniit navianartorsiortitsilluni saassussinerit pinngitsoortinnissaannut,
- 5) inuiaqatigiinni kiffartuussinerit akerliuffigineqartut ingerlanneqaannarnissaat siunertaralugu, imaluunniit
- 6) inuiaqatigiinni kiffartuussinerit ilatsiinnarnikkut akerliuffigineqartut ingerlaannarsinnaanissaat siunertaralugu aamma nalilerneqarpat kiffartuussinerit ingerlaannarnissaat kinguartitassaajunnaartoq aammalu sakkukinnerusumik pissaanermik atuineq alla naleqqukkunnaartoq.

Imm. 2. Peberspray atorneqalertinnagu pineqartunut kalleriutigineqaqqaassaaq, politiit pebersprayimik atuinissamut pilersaaruteqalernerat, politiit naalakkiinerat naalanneqanngippat. Sapinngisamik aamma qulakkeerneqassaaq, pineqartut naalakkiummut naalannissamut periarfissinneqarnissaat.

Imm. 3. Politiit pebersprayimik atuinerat inuup iluaalliulerneranik kinguneqarsimappat, nalilerneqarpallu iluaalliuut nakorsamit misissorne-

qartariaqartoq, pineqartoq piaarnerpaamik nakorsamit misissorneqassaaq. Sumiiffigisami nakorsamik najuuttoqanngippat, peqqinnissaqarfik aalajangersinnaavoq, pineqartumut misissuineq peqqinnissaqarfimmi sulisumit allamit ingerlanneqassasoq.

§ 21. Aallaasinik, anaatanik, qimminik, gassinik pebersprayinillu politiit atuinerat pillugu justitsministeri malittarisassanik aalajangersaassaaq.

Imm. 2. Taassuma saniatigut justitsministeri politiit pissaanermik atuinerat pillugu malittarisassanik aalajangersaasinnaavoq.

Kapitali 5

Politiit imminut ikiornissamut iliuusissaat

§ 22. Politiit piareersaatit ingerlassinnaavaat, imaalisoqarpat

- 1) akisussaasup inatsit manna imaluunniit malittarisassat uannga inatsimmit aallaaveqartut malillugit naalakkiutigineqartut malissimanngippagit, pineqartullu ilisimatinneqarnermigut paasereersimaguniuk naalakkiuummik malinninnginneq qanoq kinguneqarsinnaanersoq, imaluunniit
- 2) inuit ataasiakkaat imaluunniit tamat isumannaassusaat illersorniarlugu, imaluunniit tamat torersuunerannik annertuumik akornusersuutaasut pinngitsoortinniarlugit, erngertumik akuliunneq pisariaqarpat.

Imm. 2. Imm. 1 malillugu piareersaateqarnermi akisussaasuusoq politiit aningaarsartuutaannut matussusiinissamut pisussaaffeqarpoq. Aningaarsartuutitut qularnaveeqqusiussaqaarluni taarsigassarsititsisoqarsinnaavoq.

Kapitali 6

Piginnaatitsisarneq pillugu aalajangersakkat

§ 23. Tamat torersuunerat aammalu inuit ataasiakkaat imaluunniit tamat isumannaassusaata qulakkeerneqarnissaannut, ulorianartorsiornernik imaluunniit angallannermi akornutaasinnaasut pakkersimaarnissaannut, uumasunut tamat ornittagaaniittunut, pisortat atortulersuutaannut, illut normuinit allagarsiissutinullu, aqqusinerni suliffeqarfinnut, tamat nuannaariartarfiinit, aqqusinernik eqqiluisaartitsinermut akornutaasinnaasut il. il. pinngitsoortinnissaannut justitsministeri malittarisassanik aalajangersaassaaq.

Imm. 2. Imm. 1 malillugu aalajangersakkat malittarisassanik imaqarsinnaapput, politiit pisortaata naalakkiutaagallartutut imaluunniit inerteqqutaagallartutut iverititaanik, siunertaralugu tamat torersuunerannut imaluunniit inuit ataasiakkaat imaluunniit tamat isumannaassusaanut ulorinaataasinnaasut pinaveersaatinnissaat. Imm. 1 malillugu aalajangersakkat aamma malittarisassanik imaqarsinnaapput, politiit pisortaata, pisuni immikkuullarissuni, illoqarfiup iluani imaluunniit sumiiffimmi killilernerqarsimasum zone-meeqqusaannginnermik nalunaaruteqarsinnaaneramik, siunertaralugu tamat torersuunerannut imaluunniit inuit ataasiakkaat imaluunniit tamat isumannaassusaanut ulorinaataasinnaasut pinaveersaatinnissaat.

Imm. 3. Malittarisassani, Imm. 1 aamma 2 malillugit aalajangersarneqartuni, aalajangersarneqarsinnaavoq malittarisassanik unioqqutitsineq imaluunniit naalakkiummik inerteqqummilluunniit malinninnginneq, pinerluttulerinermi inatsit naapertorlugu, piareersaateqarnermik kinguneqarsinnaavoq. Tassunga ilagitillugu aalajangersarneqarsinnaavoq, suliffeqarfiit il. il. (inuit pisussaatitaasut pisinnaatitaasullu) unioqqutitsippata suliffeqarfiit il. il. pinerlunnermut akisussaatinneqarsinnaapput pinerluttulerinermi inatsimmi kapitali 5-imi malittarisassat malillugit.

§ 24. Justitsministeri kommuninut tamanut politiinut ileqqoreqqusassanik aalajangersaasinnaavoq, kommunini ataasiakkaani Kalaallillu Nunaata avannaarsuata kangianiittumi Nunami Allanngutsaaliukkami pissutsit immikkuullarissut naapertorlugit.

Imm. 2. Politiinut ileqqoreqqusassatut siunnersuut politiit pisortaata suliarissavaa kommuni/-t pineqartoq/-tut oqaloqatigereerneratigut/-isigut, politiinullu ileqqoreqqusaq Kalaallit Nunaata avannaarsuata kangianiittumi Nunami Allanngutsaaliukkami atuuttussaq Naalakkersuisut oqaloqatigereernerisigut politiit pisortaata suliarissavaa.

Imm. 3. Politiinut ileqqoreqqusaq tamat torersuunerannik qularnaarininnermut, inuit ataasiakkaat aammalu tamat isumannaassusaannik illersuinnermut aammalu inerteqquteqarallanermut naalakkiuteqarallarnermullu tunngasunik aalajangersakkanik imaqarsinnaavoq.

Imm. 4. Politiinut ileqqoreqqusami aalajangersarneqarsinnaavoq, ileqqoreqqusami aalajangersakkanik unioqqutitsineq imaluunniit naalakkiummik inerteqqummilluunniit malinninnginneq ileqqoreqqusaq malillugu akiligassitsinnermik kinguneqarsinnaasut. Tassunga ilagitillugu aalajangersarneqarsinnaavoq, suliffeqarfiit il. il. (inuit pisussaatitaasut pisinnaatitaasullu) unioqqutitsippata suliffeqarfiit il. il. pinerlunnermut akisussaatinneqarsinnaapput pinerluttulerinermi inatsimmi kapitali 5-imi malittarisassat malillugit.

Imm. 5. Politiinut ileqqoreqqusat Lovtidende-mi tamanut saqqummiunneqassapput.

Kapitali 6 a

Illersornissaqarfiup politiinut ikiuinera

§ 24 a. Politiit Illesornissaqarfimmut ikiorneqarnissamut noqqaasinnaapput ikiorneqarlutillu, uani inatsimmi taaneqartut suliassat naammassinissaannut:

- 1) Aaqqissuussinerit anginerusut, ajutoornerit, ajunaarnersuit il. il. eqqarsaatigalugit angallannermik aqutsineq, misissuineq aamma mattussilluni ungalulersuinissamut piareersaatit.
- 2) Inatsisit atuuttut malillugit, misissuinnermik aamma nakkutilliinnermik politiinut suliassat.
- 3) Pigisanik imaluunniit inunnik ujaasineq.
- 4) Qimagussortitsinnermik, kalerrisaarinnermik, nakkutilliinnermik, mattussinnermik, paarsinnermik aamma nakkutilliilluni angalaarnermik suliassat il. il. siunertaralugu, sakkortuumik pinerlunnerit allallu pisut inuit inuunerinik, peqqissusaannik imaluunniit suliffeqarfinnut atortulersuutinullu inuiaqatigiinnut pingaaruteqartunut ulorianartorsiortitsinnaasunik pinaveersaatinnissaq aammalu pinngitsoortitsinnissaq.
- 5) Inummik illersuineq, tigusamik annaassineq, operativ antiterrorberedskabi, tigusarinninnerit ulorianarnerusut aammalu suliassat allat immikkut iliuuseqarfiusut.
- 6) Suliassanik allanik Illersornissaqarfiup atuunneranut attuumassuteqartunik imaluunniit Illersornissaqarfiup immikkut ilisimasaqarfisaanik imaluunniit atortulersuutitigut naammassinnaasaanik ingerlatsineq.

Imm. 2. Imm. 1 naapertorlugu ikiorneqarnissamut noqqaaneq taamaallaat pisinnaavoq, politiinut isumalluutaasut naammanngippata imaluunniit naammappata, suliassaq eqqarsaatigalugu Illersornissaqarfiup naammassinnaasaannut assingusutut.

Imm. 3. Eqqartuussisarnermik inatsimmi § 62, imm. 3 malillugu Illersornissaqarfimmi sulisut politiitut oqartussaassuseqartitaasut uani kapitalimi aalajangersakkani pineqanngillat.

§ 24 b. § 24 a malillugu Illersornissaqarfiup politiinut ikiuinera politiinit aqunneqassaaq aammalu politiit suliassanut naammassininninnissaat pillugu malittarisassanut naapertuuttumik ingerlanneqassalluni. Aalajangersakka-

nut potiinut tunngasunut naapertuuttumik, Illersornissaqarfimmut teknikkikut, ingerlatsinikkut aammalu isumannaassutsimut aalajangersakkat atuutissapput.

Imm. 2. Politiinut ikiuunnermut atatillugu Illersornissaqarfimmi sulisut aalajangersimasut iliuuseqarnissamut piginnaatinneqarsinnaapput, uani inatsimmi kapitali 3-5 malillugit aammalu eqqartuussisarnermi inatsisip tigusarinninnermut, timikkut akuliunnermut, misissuinnermut, arsaarinninnermut edition-imullu malittarisassai malillugit, politiinut iluaqutaasumik. Piginnaatitsineq pissaaq rigspolitichefip imaluunniit Politiit Paasiniaasartuisa pisortaata aalajangersaanera malillugu aammalu forsvarsministerip imaluunniit taassuma pisinnaatitaata oqaloqatigineqareerneratigut.

§ 24 c. Justitsministeri forsvarsministeri isumaqatigiinniarfigeriarlugu politiit Illersornissaqarfimmiit ikiorneqarnissaannut, politiit suliassap naammassineqarnissaanut akisussaanerannut, politiit Illersornissaqarfiup sulisuinik aqutsisuunissaannut aammalu § 24 b, imm. 2 malillugu piginnaatitaanermik tunniussinissamut, tassani ilagitillugu ilinniagaqarsimanisamik piumasaqaatit il. il. pillugit, noqqaassutaat pillugit malittarisassanik aalajangersaasinnaavoq.

§ 24 d. Illersornissaqarfiup suliassaanut allanut atatillugu politiit Illersornissaqarfimmit ikiorneqarsinnaapput, imaani silaannarmilu politiit suliassaanut tunngatillugu.

Imm. 2. Justitsministeri forsvarsministeri isumaqatigiinniarfigeriarlugu Illersornissaqarfiup imm. 1 malillugu politiit imaani silaannarmilu suliassaanik isumaginninnerat pillugu malittarisassanik aalajangersaasinnaavoq.

§ 24 e. Justitsministeri forsvarsministeri isumaqatigiinniarfigeriarlugu Illersornissaqarfiup sakkutooqarfinnik pilersitsigallarnissaanut piareersaa-teqarluni aalajangersaasinnaanera pillugu malittarisassanik aalajangersaasinnaavoq siunertaralugu, sakkutuunik, danskinik nuamilu allamiunik, Kallaallit Nunaanni sakkutooqarfiit avataanni inissisimasunik, taakkualu ator-tuunik, ulorianartorsiortitsisinnaasut pinaveersaartinnissaat pinngitsoortinnissaallu.

Kapitali 7

Atuutsitsilernissamut aalajangersakkat il. il.

§ 25. Peqqussut atuutilissaaq ulloq [...].

Imm. 2. § 23, imm. 2, 2. imm., peqqussutip atuutilerneraniit ukiut pingasut qaangiunneranni atorunnaassaaq.

§ 26. (Kalaallit Nunaanni atuutilissanngilaq)

§ 27. (Kalaallit Nunaanni atuutilissanngilaq)

§ 28. Inatsit malillugu inassutit atuutsinneqartut Kalaallit Nunaannut atuutinngillat.

¹ Aalajangersagaq imatut oqaasertaqarpoq: »Inatsit Savalimmiunut Kalaallit Nunaannullu atuutinngilaq, kunngilli peqqussutaatigut tamakkiisumik ilaannakortumilluunniit Savalimmiunut Kalaallit Nunaannullu atuutsinneqalersinnaalluni, Savalimmiuni Kalaallit Nunaannilu pissutsinut naapertuuttunik.«

² Aalajangersagaq imatut oqaasertaqarpoq: »Kunngip peqqussutaatigut § 4 Kalaallit Nunaannut atuutsinneqalersinnaavoq, allannguuteqartillugu Kalaallit Nunaanni pissutsinut naapertuuttunik.«

³ Aalajangersagaq imatut oqaasertaqarpoq: »Kunngip peqqussutaatigut § 2 Kalaallit Nunaannut atuutsinneqalersinnaavoq Kalaallit Nunaanni pissutsinut naapertuuttunik.«

⁴ Aalajangersagaq imatut oqaasertaqarpoq: »Inatsit Savalimmiunut Kalaallit Nunaannullu atuutinngilaq, kunngilli peqqussutaatigut § 1 Savalimmiunut Kalaallit Nunaannullu atuutsinneqalersinnaalluni, allannguuteqartillugu Savalimmiuni Kalaallit Nunaannilu pissutsinut naapertuuttunik.«

⁵ Aalajangersagaq imatut oqaasertaqarpoq: »Kunngip peqqussutaatigut § 4 tamakkiisumik ilaannakortumilluunniit Kalaallit Nunaannut atuutsinneqalersinnaavoq, allannguuteqartillugu Kalaallit Nunaanni pissutsinut naapertuuttunik.«

⁶ Aalajangersagaq imatut oqaasertaqarpoq: »Inatsit Savalimmiunut Kalaallit Nunaannullu atuutinngilaq, kunngilli peqqussutaatigut tamakkiisumik ilaannakortumilluunniit Savalimmiunut Kalaallit Nunaannullu atuutsinneqalersinnaalluni, allannguuteqartillugu Savalimmiuni Kalaallit Nunaannilu pissutsinut naapertuuttunik.«

⁷ Aalajangersagaq imatut oqaasertaqarpoq: »Inatsit Savalimmiunut Kalaallit Nunaannullu atuutinngilaq, kunngilli peqqussutaatigut § 1 tamakkiisumik ilaannakortumilluunniit Savalimmiunut Kalaallit Nunaannullu atuutsinneqalersinnaalluni, allannguuteqartillugu Savalimmiuni Kalaallit Nunaannilu pissutsinut naapertuuttunik.«

⁸ Aalajangersagaq imatut oqaasertaqarpoq: »Inatsit Savalimmiunut Kalaallit Nunaannullu atuutinngilaq, kunngilli peqqussutaatigut tamakkiisumik ilaannakortumilluunniit Savalimmiunut Kalaallit Nunaannullu atuutsinneqalersinnaalluni, allannguuteqartillugu Savalimmiuni Kalaallit Nunaannilu pissutsinut naapertuuttunik.«

⁹ Aalajangersagaq imatut oqaasertaqarpoq: »Inatsit Savalimmiunut Kalaallit Nunaannullu atuutinngilaq, kunngilli peqqussutaatigut §§ 1,3 aamma 4 tamakkiisumik ilaannakortumilluunniit Savalimmiunut Kalaallit Nunaannullu atuutsinneqalersinnaalluni, allannguuteqartillugu Savalimmiuni Kalaallit Nunaannilu pissutsinut naapertuuttunik.«

¹⁰ Aalajangersagaq imatut oqaasertaqarpoq: »Inatsit Savalimmiunut Kalaallit Nunaannullu atuutinngilaq, kunngilli peqqussutaatigut tamakkiisumik ilaannakortumilluunniit Savalimmiunut Kalaallit Nunaannullu atuutsinneqalersinnaalluni, allannguuteqartillugu Savalimmiuni Kalaallit Nunaannilu pissutsinut naapertuuttunik.«